

- प्रधानमंत्री नरेन्द्र मोदी रसायन मुक्त खेती ने मजबूत बणावण सागे दिसावर मांय बिकी माथे खास ध्यान देवण बाबत् कह्यो।
- कोटा-बूंदी ग्रीनफील्ड हवाई अड्डा रा काम री नींव काल रखी जावेला-करीब एक हजार 5 सौ करोड़ रुपया ऊँ बत्ता खर्च ऊँ हवाई अड्डो बणायो जावेला।
- राज्य मांय खाद री बिकी मांय गडबड़ियां करण वाळा 13 सौ ऊँ बत्ता दुकानदारां रे खिलाफ कार्रवाई।
- यूपीएससी री सिविल सेवा परीक्षा 2025 रा नतीजा रो ऐलाण करी ज्यो-चित्तौड़गढ़ जिला रा डॉ. अनुज अग्निहोत्री देश मांय अव्वल रह्या।

000

प्रधानमंत्री नरेन्द्र मोदी कह्यो है के खेती-बाड़ी देश री माली व्यवस्था री रीढ़ है अर लम्बा बगत री विकास यात्रा रो खास खम्भो है। वे कृषि अर ग्रामीण परिवर्तन मुद्दा माथे राखी ज्यी वेबिनार मांय बोल रह्या हा। श्री मोदी कह्यो के सरकार खेती-बाड़ी रा हलका ने मजबूत बणावण सारू लगातार केई जतन कीना है। प्रधानमंत्री रसायन मुक्त खेती अर प्राकृतिक खेती ने मजबूत बणावण अर दिसावर मांय बिकी माथे खास ध्यान देवण बाबत् कह्यो। वे कह्यो के केंद्रीय बजट मांय खेती-बाड़ी रा ऊंचा मोल रा उत्पादां माथे ई खास ध्यान दियो ज्यो है।

000

राज्य रा हाड़ौती हलका मांय हवाई सेवावां ने बधावो देवण सारू काल लोकसभा अध्यक्ष ओम बिरला अर मुख्यमंत्री भजनलाल शर्मा कोटा-बूंदी ग्रीनफील्ड हवाई अड्डा रा काम री नींव रखेला। करीब एक हजार 5 सौ 7 करोड़ रुपया रा खर्च ऊँ बणायो जावण वाळा ई हवाई अड्डा मांय 20 हजार वर्गमीटर हलका रो टर्मिनल भवन अर 3 हजार 2 सौ मीटर लम्बो रन-वे बणायो जावेला जठे ऊँ ए-321 भांत रा हवाई जहाज उड़ अर उतर सकेला। इण ऊँ कोटा रा कोचिंग संस्थानां अर सैर-सपाटा रा हलकां रो हवाई संपर्क बधेला। म्हाणा कोटा खबरनवीस बतायो के कार्यक्रम रे दौरान हलका मांय पीवण रा पाणी री दो परियोजनावां, नौनेरा वृहद पेयजल परियोजना अर परवन-अकावद वृहद पेयजल परियोजना रा काम रो भूमि-पूजन ई कर्यो जावेला।

000

राजस्थान विधानसभा री कार्यवाही अब दस मार्च तांई चालेला। विधानसभा अध्यक्ष वासुदेव देवनानी री सदरत मांय व्ही कार्य सलाहकार समिति री मीटिंग मांय ओ फैसलो करी ज्यो। काल अर 8 मार्च ने सदन री मीटिंग नी व्हेला। नौ मार्च ने राजस्थान पंचायतीराज संशोधन बिल अर राजस्थान आयुर्वेद अर योग चिकित्सा विश्वविद्यालय बिल माथे चर्चा व्हेला। पंचायतीराज संशोधन बिल मांय पंचायत चुनाव लड़बा सारू दो ऊँ बत्ता बच्चां नी व्हेवण री शर्त खत्म करण रो प्रस्ताव ई कर्यो जावेला।

दस मार्च ने राजस्थान नगरपालिका संशोधन बिल अर महाराणा प्रताप खेलकूद विश्वविद्यालय बिल सदन मांय चर्चा सारू पेश कर्या जावेला।

000

कृषि मंत्री डॉ. किरोड़ी लाल मीणा आज विधानसभा मांय बतायो के किसानां ने खाद सागे दूजा सामान ज़ोरी बेचण वाळां रे खिलाफ कार्यवाही करी ज्यी है। वे प्रश्नकाल रे दौरान बतायो के महकमा री ओर ऊँ राज्य मांय ग्यारह हजार नौ सौ अड़तीस जांच करी ज्यी। ई दौरान खाद रा अठारह हजार तीन सौ उन्नीस नमूना लिया ज्यो। मंत्री बतायो के गडबड़ियां री शंका वाळी सात सौ पैसठ फर्मां ने कारण बताओ नोटिस दिया ज्यो है, जद के तीन सौ इक्यासी

फर्मा कानी ऊँ सामान बेचण माथे रोक लगायी ज्यी है अर एक सौ उनहत्तर फर्मा रा लाइसेंस थोड़ा बगत सारू मुअत्तल करी ज्या है या निरस्त कर दिया ज्या है। डॉ. मीणा कह्यो के खाद री काला बाज़ारी अर तस्करी रोकण सारू राज्य अर ज़िला स्तर माथे टास्क फोर्स अर निगरानी समितियां बनायी ज्यी है। वे बतायो के सरहदी ज़िलां मांय पुलिस री मदद ऊँ चेक पोस्ट बनाया जावेला।

000

नागौर ज़िला रा डेगाना हलका री स्कूलां सारू दरी-पट्टी री खरीद मांय व्ही कथित गड़बड़ी री जांच करायी जावेला। शिक्षा मंत्री मदन दिलावर आज विधानसभा मांय ओ ऐलाण कीनो। वे बतायो के जांच पूरी व्हेवण ताई डेगाना रा वां बगत रा ब्लॉक शिक्षा अधिकारी ने मुअत्तल करण रा हुकम दिया ज्या है। सदन मांय भाजपा रा विधायक अजय सिंह किलक कानी ऊँ उठायी ज्या सावाल रा जवाब मांय दिलावर मान्यो के विधायक कोष ऊँ व्ही ई खरीदी मांय गड़बड़ियां री शंका है। वे कह्यो के रिकॉर्ड रे मुजब मोटी तादाद मांय दरियां री खरीदी करी ज्यी है पण अ दरियां स्कूलां मांय नी मिली। विधायक किलक राज्य री लारली सरकार री बगत स्कूलां मांय जबरन दरियां भिजवाई ज्यी अर विरोध करण वाळा संस्था प्रधानां रो तबादलो करण रो आरोप माण्ड्यो।

000

गृह मंत्री अमित शाह कह्यो है के केंद्रीय औद्योगिक सुरक्षा बल-सीआईएसएफ रे बगैर भारत रो औद्योगिक विकास नी व्हे सके है। वे ओडिशा मांय कटक रा मुंडुली मांय सीआईएसएफ रा 57 वां स्थापना दिवस समारोह मांय बोल रह्या हा। श्री शाह कह्यो के सीआईएसएफ देश मांय खास औद्योगिक ठिकाणां री हिफाजत तैय करण मांय खास काम कर रह्यो है।

000

आपदा प्रबंधन और नागरिक सुरक्षा मंत्री डॉ. किरोड़ी लाल आज जयपुर मांय नागरिक सुरक्षा विभाग री आधिकारिक वेबसाइट रो उद्घाटन कीनो। आ वेबसाइट महकमां री सेवावां, खुद सेवकां अर आमजन बीचे तालमेल बिठावेला। पोर्टल माथे महकमा री योजनावां, सिखावण देवण रा कार्यक्रममां अर खुद सेवकां री जाणकारी मुहैया करायी जावेला। डॉ. किरोड़ी लाल कह्यो के महकमां री खुद री वेबसाइट व्हेवण ऊँ जणकारियां एक ही ठौड़ मिल सकेला।

000

संघ लोक सेवा आयोग-यू-पी-एस-सी सिविल सेवा परीक्षा-2025 रा नतीजा रो ऐलाण कर दीनो है। चित्तौड़गढ़ ज़िला मांय रावतभाटा रा रहवासी डॉ. अनुज अग्निहोत्री देशभर मांय अब्वल रह्या है। डॉ. अनुज तीजी कोशिश मांय आ कामयाबी हासिल कीनी। इण ऊँ पैली वे पहली दफा साल 2023 री परीक्षा मांय बैट्या अर कामयाबी हासिल कीनी, ज्यीं पाछे वां ने दिल्ली मांय एस-डी-एम रा ओहदा माथे नौकरी मिली ही। डॉ. अनुज साल 2023 मांय जोधपुर एम्स ऊँ एम-बी-बी-एस री पढ़ाई पूरी कीनी। वे रावतभाटा री परमाणु ऊर्जा केंद्रीय स्कूल ऊँ सरूआती भणार्ई कीनी। डॉ. अनुज री कामयाबी माथे वां रा पिरवार वाळा अर दूजा लोग खुशी जतायी है। मुख्यमंत्री भजन लाल शर्मा ई सोशल मीडिया पोस्ट रे जरिये डॉ. अनुज ने बधाई दीनी।

000

जयपुर रा कॉन्स्टीट्यूशन क्लब मांय आज राज्य स्तर रो विकसित भारत युवा संसद कार्यक्रम राख्यी ज्यो। युवा कार्यक्रम अर खेल मंत्रालय कानी ऊँ राख्यी जा रही ई होड़ मांय प्रदेश रा न्यारा-न्यारा ज़िला रा 2 सौ पांच नौजवान शामिल व्ह्या। खेल अर युवा मामलात् विभाग रा सचिव नीरज के. पवन बतायो के विकसित भारत संकल्प रा तैत ओ कार्यक्रम पैली राज्य रो सगळा ज़िलां मांय राख्यी ज्यो हो।

000

पाली रा सरकारी बांगड़ अस्पताल अर सोजत-सुमेरपुर गेला माथे रा किशोर संरक्षण घर मांय पालना गृह चलाया जा रह्या है। महिला अर बाल अधिकारिता विभाग री सहायक निदेशक डॉ. टीना अरोड़ा जनता ऊँ अणछावता बच्चां ने असुरक्षित ठौड़ां छोड़बा री बजाए आं पालना घरां मांय लावण री अपील कीनी। वे बतायो के आं केन्द्रां मांय लाया जावण वाळा बच्चां ने देश रा न्यारा-न्यारा राज्यां अर परदेश मांय गोद दिया जावे है।

000

जयपुर रा भट्टा बस्ती पुलिस थाना हलका री फिरदौस मस्जिद मांय नमाज़ री बगत भींत पड़ जावण ऊँ 19 जणा मलबा हेटे दब ग्या। दब्योड़ा लोगां ने पुलिस जतना सागे मिल र मलबा ऊँ बाहर निकाळ्या। जख्मी लोगां ने सवाईमान सिंह अर कांवटिया अस्पताल मांय भर्ती करायी ज्या है। एसएमएस मांय भर्ती करायी ज्या 11 जणा मांय ऊँ तीन री हालत चिन्ता जोगी है। हादसा री बगत मस्जिद मांय करीब एक हजार लोग मौजूद हा।

000